

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков.

Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 6. Господи, воззвах к Тебе, услыши мя.

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, внемгда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры глас 6

Стих: Изведи из темницы душу мою, исповедатися имени Твоему.

Победу имея, Христе, юже на ада, на Крест возшел еси: да во тьме смерти сядящая воскресиши с Собою, Иже в мертвых Свободь, Источаяй живот от Своего света, Всесильне Спасе, помилуй нас.

Стих: Мене ждут праведницы, дондеже воздаси мне.

Днесь Христос смерть поправ, якоже рече, воскресе, и радование миру дарова, да вси взывающе, песнь тако рцем: Источниче жизни, Неприступный Свете, Всесильне Спасе, помилуй нас.

Стих: Из глубины воззвах к Тебе Господи, Господи, услыши глас мой.

Тебе, Господи, Сущаго по всей твари, грешнии камо бежим; на Небеси Сам живеша, во аде поправ еси смерть. Во глубины морския; тамо рука Твоя, Владыко. К Тебе прибегаем, Тебе припадающе молимся: Воскресый из мертвых, помилуй нас.

Стих: Да будут уши Твои, внимлюще гласу моления моего.

Крестом Твоим, Христе, хвалимся, и воскресение Твое поем и славим: Ты бо еси Бог наш, разве Тебе инаго не вемы.

Стих: Аще беззакония назриши Господи, Господи, кто постоит Яко у Тебе очищение есть.

Выну благословяще Господа, поем воскресение Его: Крест бо Претерпев, смертью смерть погуби.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Слава силе Твоей, Господи, яко упразднил еси державу имущаго смерти: обновил еси нас Крестом Твоим, даруя нам живот и нетление.

Стихиры Троицы святителю Григорию, глас 2

Стих: От стражи утренния до ноши, от стражи утренния, да уповает Израиль на Господа.

Киими благопохвалений песньми воспоим иерарха, Богословия трубу, огнедохновенная уста благодати, честное Духа приятелище, столпа церкви непоколебимаго, великое вселенная украшение, реку премудрости, света светильника, звезду ясную, тварь просвещающую.

Стих: Яко у Господа милость, и многое у Него избавление, и Той избавит Израиля от всех беззаконий его.

Киими благопохвалений песньми воспоим иерарха, Богословия трубу, огнедохновенная уста благодати, честное Духа приятелище, столпа церкви непоколебимаго, великое вселенная украшение, реку премудрости, света светильника, звезду ясную, тварь просвещающую.

Стих: Хвалите Господа вси языцы, похвалите Его вси людие.

Киими песнопений цветами венчаим иерарха, благочестия поборника, и нечестия противника, теплаго веры предстателя, великаго наставника и учителя, цевницу всекрасную Духа, златосияющий язык, источник кипящий токи исцелений верным, великаго и досточуднаго Григория.

Стих: Яко утвердися милость Его на нас, и истина Господня пребывает во век.

Киими земнороднии устнами восхвалим иерарха, церкви учителя, света Божественнаго проповедника, Небеснотаинника Троицы, велие монашествующих украшение, деянием и видением просиявшаго, Фессалонитскую похвалу, согражданина имущаго, мироточнаго на Небесех Божественнаго и пречуднаго Димитрия

Слава, святителю, глас 6

Преподобне, треблаженне, святейший отче, пастырю добрый, и архипастыря Христа учениче, положивый душу о овцах: сам и ныне отче наш Богоносе Григорие, испроси молитвами твоими, даровати нам велию милость.

И ныне, глас 6, Догматик:

Кто Тебе не ублажит, Пресвятая Дево; кто ли не воспоет Твоего Пречистаго Рождества; безлетно бо от Отца Возсиявый Сын Единородный, Тойже от Тебе, Чистыя, пройде, неизреченно воплощься, естеством Бог сый, и естеством быв Человек нас ради, не во двою лицу Разделяемый, но во Двою Естеству неслитно Познаваемый. Того моли, Чистая, Всеблаженная, помилуватися душам нашим

Вечерний вход

Премудрость. Прости.

Свете тихий святые славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевше свет вечерний, поем Отца, Сына и Святаго Духа, Бога. Достоин еси во вся времена пет быти гласы преподобными, Сыне Божий, живот даяй, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, Господь воцарися, в лепоту облечеса.

Стих: Облечеса Господь в силу и препоясаса.

Стих: Ибо утверди вселенную, яже не подвижится.

Стих: Дому Твоему подобает святыня, Господи, в долготу дней.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобает хвала. Тебе подобает пение, Тебе слава подобает, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 6-й:

Воскресение Твое, Христе Спасе, Ангели поют на Небесех, и нас на земли сподоби, чистым сердцем Тебе славити.

Стих: Господь воцарися, в лепоту облечеса.

Врата сокрушив медная, и вереи адовы сотрый, яко Бог всемогущ, род человеческий падший воскресил еси. Сего ради и мы согласно вопием: Воскресый из мертвых, Господи, слава Тебе.

Стих: Ибо утверди вселенную, яже не подвижется.

Тления нас древняго Христос исправити хотя, на Кресте пригвождается, и во гробе полагается. Егоже мироносицы жены со слезами искаху, плачуща глаголаху: увы нам, Спасе всех, како изволил еси во гробе вселитися; Вселивыйся же хотя, како украден был еси; како преложился еси; кое же место Твое Живоносное сокры Тело; но, Владыко, яко обещался еси нам явися, и утоли от нас рыдание слез. Плачущимся же им, Ангел к ним возопи: от плача преставша Апостолом рците, яко воскресе Господь, мирови даруя очищение и велию милость.

Стих: Дому Твоему подобает святыня, Господи, в долготу дней.

Распныйся яко восхотел еси, Христе, и смерть погребением Твоим пленивый, тридневен воскресл еси, яко Бог, со славою, мирови даруя безконечную жизнь, и велию милость.

Слава, святителя, глас 8

Бодрый язык твой ко учительству, во ушесех сердечных возглашая, ленивых души возоставляет, и Боговещанными словесы твоими лествица обретается, от земли к Богу возносящая. Темже Григорие, Фессалии чудо, не престай моляся Христу, просветити Божественным светом чтущия тя.

И ныне, Богородичен, глас 8

Безвестная Дево, Яже Бога неизреченно зачещи плотию, Мати Бога Вышняго, Твоих рабов мольбы приими, Всенепорочная, всем подающи очищение прегрешений: ныне наша моления приемлющи, моли спастися всем нам.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святой Боже, Святой Крепкий, Святой Безсмертный, помилуй нас (трижды).
Слава Отцу и Сыну и Святому Духу, и ныне и присно и во веки веков. Аминь.
Пресвятая Троице, помилуй нас; Господи, очисти грехи наша; Владыко, прости беззакония наша;
Святой, посети и исцели немощи наша, имене Твоего ради. Господи, помилуй (трижды).
Слава Отцу и Сыну и Святому Духу, и ныне и присно и во веки веков. Аминь.
Отче наш, Иже еси на небесех! Да святится имя Твое, да приидет Царствие Твое, да будет воля
Твоя, яко на небеси и на земли. Хлеб наш насущный даждь нам днесь; и остави нам долги наша, яко
же и мы оставляем должником нашим; и не введи нас во искушение, но избави нас от лукаваго.
Яко Твое есть Царство, и сила, и слава, Отца и Сына и Святаго Духа, ныне и присно и во веки
веков. Аминь.

Отпустительный тропарь глас 4:

Богородице, Дево, радуйся, Благодатная Марие, Господь с Тобою; благосло-
венна Ты в женах и благословен Плод чрева Твоего, яко Спаса родила еси душ
наших (трижды).

Буди имя Господне благословенно от ныне и до века (трижды).

33-й псалом

Благословлю Господа на всякое время, выну хвала Его во устех моих.
О Господе похвалится душа моя: да услышат кротцыи и возвеселятся.
Возвеличите Господа со мною, и вознесем имя Его вкупе.
Взысках Господа, и услыша мя, и от всех скорбей моих избави мя.
Приступите к Нему, и просветитесь, и лица ваша не постыдятся.
Сей нищий воззва, и Господь услышай, и от всех скорбей Его спасе и.
Ополчится Ангел Господень окрест боящихся Его, и избавит их.
Вкусите и видите, яко благ Господь: блажен муж, иже уповае на Нань.
Бойтесь Господа вси святии Его, яко несть лишения боящимся Его.
Богатии обнищаша и взалкаша: взыскающии же Господа не лишатся всякаго
блага.

Благословение Господне на вас, Того благодатию и человеколюбием, всегда, ныне и присно и во
веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).
Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози востают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не
забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа,
слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явися нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 6

Ангельския Силы на гробе Твоем, и стрегущии омертвеша; и стояше Мария во гробе, ищущи Пречистаго Тела Твоего. Пленил еси ад, не искусився от него; сретил еси Деву, даруяй живот. Воскресый из мертвых, Господи, слава Тебе. (дважды)

Слава, Тропарь святителя, глас 8:

Православия светильниче, церкви утверждение и учителю, монахов доброто, Богословов поборниче непреборимый, Григорие чудотворче, Фессалонитская похвало, проповедниче благодати, молися выну спастися душам нашим.

И ныне, Богородичен, глас 8:

Иже нас ради рождейся от Девы и распятие претерпев, Благий, испровергий смертию смерть, и воскресение явлей, яко Бог, не презри, яже создал еси рукою Твоею; яви человеколюбие Твое, Милостиве, приими рождшую Тя Богородицу, молящуюся за ны, и спаси, Спасе наш, люди отчаянныя.

Чтение кафизм

Господи помилуй 3р., Слава,
И ныне... читает кафизму в 3 Славы

Малая ектения,

Паки и паки миром Господу помолимся...

По 1-м стихословии, седальны воскресны, глас 6

Гробу отверсту, аду плачущуюся, Мария вопияше ко скрывшимся апостолом: изыдите винограда делателие, проповедите воскресения слово: воскресе Господь, подая миру велию милость.

Стих: Воскресни Господи Боже мой, да вознесется рука Твоя, не забуди убогих Твоих до конца.

Господи, предстояше гробу Твоему Мария Магдалина, и плакаше вопиющи, вертоградаря Тя мнящи, глаголаше: где сокрыл еси вечный живот Где положил еси, Иже на престоле херувимстем; стрегущии бо сего, от страха омертвеша. Или Господа моего дадите ми, или со мною возопийте: Иже в мертвых быв, и мертвыя воскресив, слава Тебе.

Слава, и ныне, Богородичен:

Преднаписует Гедеон зачатие, и сказует Давид рождество Твое, Богородице: сниде бо яко дождь на руно, Слово во чрево Твое, и прозябла еси без семене, земле святая, миру Спасение, Христа Бога нашего, Благодатная.

Господи помилуй 3р., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 6

Живот во гробе возлежаше, и печать на камени надлежаше: яко царя спяща воины стража Христу, и враги Своя невидимо поразивый, воскресе Господь.

Стих: Исповемся Тебе Господи всем сердцем моим, повем вся чудеса Твоя.

Преднаписует Иона гроб твой, и сказует Симеон востание Божественное, безсмертне Господи: сошел бо еси яко мертв во гроб, разрушивый адова врата. Воскресл же еси кроме тления, яко Владыка, во Спасение мира, Христе Боже наш, просветивый суция во тьме.

Слава, и ныне, Богородичен:

Богородице Дево, моли Сына Твоего, волею пригвожденнаго на Кресте, и воскресшаго из мертвых Христа Бога нашего, спастися душам нашим.

Хвалите имя Господне, хвалите раби Господа. Аллилуиа (трижды).
Благословен Господь от Сиона, живой во Иерусалиме. Аллилуиа (трижды).
Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Воскресные тропари святого Иоанна Дамаскина:

Благословен еси, Господи, научи мя оправданием Твоим
Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистаясь во гробе Ангел мироносицам вещаше: видите вы гроб и уразумейте: Спас бо воскресе от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцыте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскресе от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 6

Вольною и животворящею Твоею смертию, Христе, врата адова сокрушив, яко Бог, отверзл еси нам древний рай, и воскрес из мертвых, избавил еси от тления живот наш.

Степенна, глас 6

Антифон 1

На небо очи мои возвожу, к Тебе, Слове: ущедри мя, да живу Тебе.

Помилуй нас уничиженных, устрояя благопотребныя Твоя сосуды, Слове.

Слава: Святому Духу, всякая всеспасительная вина, аще коему сей по достоянию дхнет, скоро вземлет от земных: восперяет, возвращает, устрояет горе.

И ныне, тойже.

Антифон 2:

Аще не Господь бы был в нас, никтоже от нас противу возмогл бы вражиим бранем одолети: побеждающии бо от zde возносятся.

Зубы их да не ята будет душа моя яко птенец, Слове: увы мне, како имам от врага избыти, грехолюбив сый!

Слава: Святым Духом обожение всем, благоволение, разум, мир и благословение: равнодетелен бо есть Отцу и Слову.

И ныне, тойже.

Антифон 3:

Надеющиеся на Господа врагом страшни, и всем дивни: горе бо зрят.
В беззакония рук своих, праведных жребий, помощника Тя имея Спасе, не простирает.

Слава: Святаго Духа держава на всех: Емуже Вышняя воинства поклоняются, со всяким дыханием дольным.

И ныне, тойже.

Прокимен, глас 6: Господи, воздвигни силу Твою, и прииди во еже спасти нас.

Стих: Пасый Израиля вонми, наставляяй яко овча Иосифа.

Господу помолимся — Господи помилуй— Яко Свят еси Боже наш... Аминь.

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — Господи помилуй
Зр

Мир всем - И духови твоему.

От (Матфея или Марка или...) Святаго Евангелия чтение Слава Тебе, Господи, слава Тебе.

Чтение Евангелия.

Слава Тебе, Господи, слава Тебе.

Воскресение Христово видевши, поклонимся Святому Господу Иисусу, единому безгрешному. Кресту Твоему поклоняемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Покаяния отверзи ми двери жизнодавче, утренюет бо дух мой ко храму святому твоему, храм носяй телесный весь осквернен: но яко щедр, очисти благоутробною твоею милостию

И ныне и присно и во веки веков, аминь. На спасения стези настави мя Богородице, студными бо окалях душу грехми, и в лености все житие мое иждих: но твоими молитвами избави мя от всякия нечистоты.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Множества содеянных мною лютых, помышляя окаянный, трепещу страшнаго дне суднаго: но надеяся на милость благоутробия твоего, яко давид вопию ти: помилуй мя Боже по велицей твоей милости.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатыя; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единородного Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — Аминь.

Канон воскресный. Глас 6

Песнь 1

Ирмос: Яко по суху, пешешествовав Израиль по бездне стопами, гонителя фараона видя потопляема, Богу победную песнь поим, вопияше.

Распростертыма дланьма на кресте, отеческаго исполнил еси благоволения, благий Иисусе, всяческая. темже победную песнь Тебе вси поим.

Страхом к Тебе, яко рабыня, смерть повелена приступи Владыце живота, тою подающему нам безконечный живот и воскресение

Богородичен: Своего приемши Содетеля, яко Сам восхоте, от безсеменнаго Твоего чрева, паче ума воплощаема, Чистая, тварей воистинну явилася еси, Владычица.

Ин канон Триоди (о блудном сыне)

Восприемше теплыми слезами, блуднаго глас, тебе Отцу всех и Богу припадаем, вопиюще: яко согрешихом от Тебе удалившися, и блуду работавше, приими наше покаяние.

Царское преобидев благородие, еже даровал еси мне, мене ради слове, человек бывый: люте осудихся угодити свиниям, греховным вкусом: но пощади мя Спасе, милосердием Твоим.

На колену падающа мя, якоже первее блуднаго Владыко Господи, Ты притек приими, и рукама объем, подаждь ми образы Твоего спасения, вместо наемника Человеколюбче, паки Твоего сына сотворяя.

Богородичен: Богоявления Тобою сподобися Богорадованная, человеческое естество: едина бо ходатаица Дево, была еси Богу и человеком. Тем яко Божию Тя Родительницу вси достойно славим.

Ин канон святителю

Риторов Божественнии, и Богословов изряднии, и языцы Боговещаннии, приидите снидитесь в соединение, воспети по достоянию Духоритора, Божественнаго Григориа.

Столп веры, Церкви поборник, великий Григорий да восхвалится мною, всеизрядный пастырь Фессалонитский, красота чина иераршескаго воистинну.

От младенства возжелал еси лучшее житие, и совершенное отче от юности возлюбил еси мудрование, и купнонравен, и единомудрен показался еси тезоименствующаго тебе отче Григорие.

Богородичен: Буди ми Всенепорочная живота путь, наставляющий мя к Божественным селением: прельстися бо, и к пропадем злобы поползнухся, от нихже мя возведи ходатайством Твоим.

Катавасиа: Отверзу уста моя, и наполнятся духа, и слово отрыгну Царице Матери, и явлюся светло торжествуя, и воспою радуясь Тоя чудеса.

Песнь 3

Ирмос: Несть свят, якоже Ты, Господи Боже мой, вознесый рог верных Твоих, Блаже, и утвердивый нас на камени исповедания Твоего.

Бога распинаема плотию зрящи тварь, растаявашеся страхом: но содержительною дланию нас ради Распятаго, крепко держима бе.

Смертию смерть разорена лежит окаянная без дыхания: Живота бо не терпящи божественнаго приражения, умерщвляется крепкий, и даруется всем воскресение.

Богородичен: Божественнаго рожества Твоего, Чистая, всякий естества чин превосходит чудо: Бога бо преестественне зачала еси во чреве, и рождши пребываеши присно Дева.

Ин

Убоявся моих дел, и далечнаго отшествия, и расточеннаго Твоего богатства, егоже иждих в блудных стремлениих, в покаянии к Тебе зову, Отцу и Богу моему: согреших, спаси мя.

На земли согрешая, Небесе убояхся: сиче бо ми будет суд тогда препираяй, егда всяческая предстанут Слове, праведным судом Твоим судимая.

Мрачная и скверная мя помышления питаху, егда от Тебе Спасе, далече бых блудный, ныне же зову Ти: согреших, согреших, спаси тепле прибегающаго милосердию Твоему.

Богородичен: Обожися Дево адамово смешение: из чрева бо Твоего Бог Плотноносец явися, имже воззвани быхом от древняго осуждения, солгани надеждо древле обожения.

Ин

Струи Божественных учений твоих сохраняющии, всякия козни злославных избегаем, и вся избиваем твоими священными списаньми полки сих Григорие.

Премудрости буия злославных разрушил еси блаженне, премудрость Божию ипостасную имея в сердце твоём, еюже с шумом поразил еси гнилая сих шатания.

Умертвив плоти тлеемая всякое сладострастие премудре, постнически оживил еси души твоя движения, и сию Божественный орган Богословия показал еси.

Богородичен: В разуме ума и произволении, студное же и блудное житие прилежно возлюбих: но любовь Божию свяжи, молитвами Твоими, Дево Богоневестная.

Катавасия: Твоя песнословцы, Богородице, живой и независтный источниче, лик себе совокупльшия, духовно утверди, в Божественней Твоей славе венцев славы сподоби.

Малая ектения.

Паки и паки миром Господу помолимся...

Кондак Триоди, глас 4

Ныне время делательное явися, при дверех суд, востанем убо постящися, принесем слезы умиления, милостынями, зовуще: согрешихом паче песка морскаго. Но ослаби Содетелю всех, яко да приимем нетленные венцы.

Седален святителя, глас 4

Прелесть попалил еси злославных премудре, веру изъяснил еси православных добре, и мир просветил еси. Отонудуже победоносный победитель показался еси, столп Церкви, истинный иерарх, моляся не престай Христу, спастися всем нам.

Слава и ныне, Богородичен, глас 4

Скоро приими Владычице моления наша, и сия принеси Сыну твоему и Богу, Госпоже Всенепорочная: погаси обстояния злославных языковредных, укроти козни, и низложи дерзость вооружающихся безбожных Пречистая, на рабы Твоя.

Песнь 4

Ирмос: Христос моя сила, Бог и Господь, честная Церковь Боголепно поет, взывающи, от смысла чиста о Господе празднующи.

Древо процвело есть, Христе, истинная жизни: крест бо водрузися, и напоен быв кровию и водою от нетленнаго Твоего ребра, живот нам прозябе.

Не кому змий мне ложне обожение подлагает: Христос бо богоделатель человеческого естества, ныне невозбранно стезю живота мне отверзе.

Богородичен: Яко воистинну неизвещанна и непостижима, яже Твоего боголепнаго, Богородице, суть рождества, сущим на земли и на небеси, Приснодево, таинства.

Ин

Отметательное Отеческих ми повелений богатство, еже ми даровал еси, в сладострастии иждив, бых Божественных дарований нищ окаянный. Темже кающася со исповеданием не омерзи мене Владыко Господи.

Боголепно восприим нищету мене, далече Тебе древле бывшего, собою к себе присвояеши, и освящаеши мя к веселию Человеколюбче: Тело Твое Божественное Слово, воззвание мое, веселия твоя.

Да далече слезами непрестанными, вечныя муки избавимся, юже уготова Бог лукавым духовом, яко блудный, вопием: согрешихом Ти Отче, но приими вся прибегающия ны к Твоей милости.

Богородичен: Собезначальное Отцу слово Сый и Духу, от неискусомужныя Девы раждается кроме закона: пребыв убо еже бе, пребыв же паки еже от нас прият. Во двою бо естеству Един Сын есть, во обою храня естественное.

Ин

Отверз уста твоя отче премудре, Божественную премудрость проповедал еси, ейже поучался еси в сердце твоём присно, и Варлаама суетнаго несмысленна и безумна показал еси.

Зашел еси сладчайший в землю, солнце законом естества, возсияеши же утро со Христом солнце невечернее, вся назирая молитвами твоими.

Яви благодать тебе блаженне Божий, похвалу и утверждение превелие православных, и пастыря благаго, и Богослова втораго, и стада бодрого хранителя.

Богородичен: Ушеса мне отверзи душевныя Мати Божия, родившая прежде ушеса отверзшаго глухому, и Божественным внимати словесем, и исполняти сподоби. Испроси у Господа вселенней мир и душам нашим велию милость.

Катавасия: Седяй в славе на престоле Божества, во облаце легце прииде Иисус Пребожественный, нетленною дланию, и спасе зовущия: слава силе Твоей, Господи!

Песнь 5

Ирмос: Божиим светом Твоим, Блаже, утреннюющих Ти души любовию озари, молюся, Тя ведети, Слове Божий, истиннаго Бога, от мрака греховнаго взывающа..

Уступают мне херувими ныне, и пламенное оружие, Владыко, плещи мне дает, Тя видевши, Слове Божий, истиннаго Бога, разбойнику путь сотворшаго в рай.

Не ктому боюся, еже в землю, Владыко Христе, возвращения: Ты бо от земли мя возвел еси забвенна, благоутробия ради многаго, к высоте нетления воскресением Твоим.

Богородичен: Иже Богородицу Тя от души, Владычице мира благая, исповедающих спаси: Тебе бо предстательство непоборимое имама, истинную Богородительницу.

Ин

Богатства и дарований Божественных лишихся, и в страну приидох благих животных гладом тая: но ты мя Отче яко Благий, древняя славы и сладости, благосердия ради Твоего, исполни.

Помысл блуднаго, в блюде житие иждивша приимше, Отцу милостивому притецем, несумненною верою, и сокрушением сердца, яко да согрешений оставление приимем.

Не косни душе моя, в дальней стране пребывающа: но тецы вскоре, Богу и Отцу исповедающися, да приимеши разрешение, ихже зле соделала еси житие изнузивши.

Богородичен: Светлый Ты облак, носяй Солнце правды, в Тебе носимое, Пречистая Дево вемы, неразумия тьму идольскую отгоняющее, и Разумом истинным просвещающее.

Ин

Серпом словес твоих, и священными списаньми посекал еси ереси терновидныя, и плевел ложная прозябения, Православия же благочестивая положил еси семена, священноначальне Григорие.

Словеса твоя всеумудре, и честная списания суть роса Небесная, мед каменный, хлеб ангельский притекающим, питие, брашно, сладость, наслаждение, Григорие, и источник живыя воды.

Общаго тя учителя познавает земля и море, столп священный православия, и оружеположницу Божественных догмат честную, премудраго Богослова священнаго, сожителя, сопричастника, апостолом едионравнаго.

Богородичен: Струями умиления, скверны сердца моего Непорочная отмый Дево, и покаяния образы мне даруй, Твоими к щедрому Богу священными молении, егоже неизреченно родила еси.

Катавасиа: Ужасошася всяческая о Божественной славе Твоей: Ты бо, неискусообращная Дево, имела еси во утробе над всеми Бога и родила еси безлетнаго Сына, всем воспевающим Тя мир подавающая.

Песнь 6

Ирмос: Житейское море, воздвигаемое зря напастей бурей, к тихому пристанищу Твоему притек, вопию Ти: возведи от тли живот мой, Многомилостиве.

Распинаемь, Владыко, гвоздьми убо, клятву юже на нас потребил еси: копием же прободаемь в ребро, адамово рукописание растерзав, мир свободил еси.

Адам низведеса, лестию запят быв, ко адове пропасти: но иже естеством Бог же и милостив, сшел еси на взыскание, и на раму понес, совоскресил еси.

Богородичен: Пречистая Владычице, рождающая человеком кормчию Господа, страстей моих непостоянное и лютое утоли смущение, и тишину подаждь сердцу моему.

Ин

Юнейший бых сын Твой, и богатство Твое зле иждих, удалением злаго жития, и благих Твоих лишаяся Человеколюбче, прихожду Тебе Отцу и Богу моему, и прошу прощения.

Странничество безчеловечное получих, и пасти свинии осужден бых, яко мое расточих богатство, еже милостивно вскоре подал еси, и бых от всех наг: но Ты яко Бог мой ущедри.

Не имам дерзновения Человеколюбче, воззрети и видети, согрешив на Небо, безмерную высоту, ни нарещися сын Твой, блудный: но ущедри мя туне, имеяй безмерную милость.

Богородичен: Несказанное Твое Рождество, и неизреченный Рождества Твоего образ Девице, яко Бога выше ума раждаеши, Девство нескверное имущи: тем Тя вси истинную Богородицу достойно славим.

Ин

Растерзася суетное шатание, и язык Варлаама безумнаго, словесы и велении, и разума острою премудраго Царя, и твоею, Григорие.

Божественную цевницу Духа, трубу яве проповедающую Божественныя тайны, Фессалонитскаго председателя, Богословский язык, песньми почтим.

Людем иногда предводитель, яко столп огненный, веры враги попалил еси, верных же состояния просветил еси, Богомудре отче Григорие.

Богородичен: Буди ми Всечистая Владычице, тишина и пристанище утешения, преводящее к Божественному пристанищу невлаемому, бурю страстей моих укротивши.

Катавасия: Божественное сие и всечестное совершающе празднество, богомудрии, Богоматере, приидите, руками восплещим, от Нея рождаемого Бога славим.

Малая ектения.

Паки и паки миром Господу помолимся...

Кондак святителя, глас 8:

Премудрости священный и Божественный орган, Богословия светлую согласно трубу, воспеваем тя Григорие Богоглагольниче: но яко ум уму первому предстояй, к Нему ум наш отче настави, да зовем: радуйся проповедниче благодати.

Икос:

Ангел явился еси на земли, неизреченная Божия человеком возвещающая: безплотных бо гласы, от человеческих сый, и плотию употребляясь, удивил еси нас, и вопити тебе Богоглаголиве увещал еси сия: радуйся, Имже тьма сокрыся: радуйся, Имже свет взыде. Радуйся, несозданного Божества ангеле: радуйся, созданного и буяго воистинну обличителю. Радуйся, Высоту невозходимую, Божественное естество рекий: радуйся, глубину неудобь видимую, действие рекий: радуйся, яко славу Божию добре рекл еси: радуйся, яко мнения злодеев отрекл еси. Радуйся светильниче, показавый Солнце: радуйся чаше, пития Божественного подательнице. Радуйся, Имже Истина просиявает: радуйся, имже помрачися лжа. Радуйся, проповедниче благодати.

Песнь 7

Ирмос: Росодательну убо пещь содела Ангел преподобным отроком, халдеи же опаляющее веление Божие мучителя увеща вопити: благословен еси, Боже отец наших.

Рыдающее во страсти Твоей солнце, во мрак облечеса, и во дни по всей, Владыко, земли свет померче, вопия: благословен еси Боже отец наших.

Облекошася Христе схождением Твоим во свет преисподняя, праотец же веселия исполнь, явися ликовствуя, възграся, вопия: благословен еси, Боже отец наших.

Богородичен: Тобою, Мати Дево, свет возсия всей вселенной светлый: Зиждителя бо Ты всех родила еси Бога, Егоже проси, Всечистая, нам низпослати верным велию милость.

Ин

Дерзновения не имам, еже нарещися сын Твой, Отче Человеколюбче, яко единого от наемник Твоих быти молюся, не гнушайся мене зовуща: Отец наших Боже благословен еси.

Осквернившие первым житием жизнь, и погубившие благородие первое, притецем Единому Отцу и Богу нашему, покаянием теплым прияти спасение.

Жесток гражданин, емуже работати окаянный осудихся: глад же, егоже подъях, свиниям угождая, крепок и нестерпимъ: но обращайся прошу, Спасе, помилуй мя.

Богородичен: Умерщвленное естество оживила еси, едина Живот рождающая Дево Богородице: темже Тя спасение вернии свемы, Отец наших Бога плотию рождающую.

Ин

Словесем беседующии, и списанием твоим Григорие, разуму поучаются Божиию, и полны являються премудрости Божия Духовныя, и несозданную благодать, и действие Божие Богословствуют.

Мечь и стрелы злославных сокрушил еси, и гордость варлаамову, и всякую силу еретическую, яко тkanie паучины расточил еси, аки камень превеликий иерарше.

Запечатлесе твоими словесы и догматы вера благочестивых, и дерзость ереси ста Григорие, и низложение православия преста, и крепость злославных.

Богородичен: Струи Тя источника, усохшии страстей болезнями, ведуще воистинну, почерпаем спасение, и Божественныя струи, и взываем: благословен Всечистая, Плод Твоего чрева.

Катавасиа: Не послужиша твари богомудрии паче Создавшего, но огненное прещение мужески поправше, радовахуся поюще: препетый отец Господь и Бог, благословен еси!

Песнь 8

Ирмос: Из пламене преподобным росу источил еси, и праведнаго жертву водою попалил еси: вся бо твориши, Христе, токмо еже хотети. Тя превозносим во вся веки.

Иудейския древле пророкоубийцы люди, богоубийцы зависть ныне содела, Тебе на крест вознесшия, Слове Божий: Егоже превозносим во вся веки.

Небеснаго круга не оставил еси, и во ад сошед, всего совоздвигл еси лежащаго во гноищи, Христе, человека, Тя превозносяща во вся веки.

Богородичен: От Света Светодавца Слова зачала еси, и рождши неизреченно Сего, прославилася еси: Дух бо в Тя, Отроковице, Божий вселися. Темже Тя поем во вся веки.

Ин

Безмернаго Владыко, и многаго милосердия Твоего, вемы богатство в Тя веровавшии. Темже Ти припадаем с блудным вси тепле: приими согрешившия, и к Тебе прибегшия: несть бо, несть грех Щедре, Твое человеколюбие победити могый.

Милосердия ради Владыко себе смилив, падшим Твоим сыном приблизился еси: сам бо Человеколюбче срел еси падших, и облобызаеши, и спасение даруеши: аще кто и долу паднет, Милостив Сый не гневаешися, яко Человеколюбец.

Страшнейший суд мене усрящет о Владыко, яко Тя Человеколюбца и незлобива зря, не притекаю к Тебе, блуднаго зовый гласом, но в лености житие препровождаю: Ты убо милостив буди ми, и осуждения онаго исхити Щедре, покаяния ради.

Троицен: Не три боги славим, но Едино Божество, Три же воистинну ипостаси чтим, Отца нерожденна, и рожденна Сына от Отца, и исходна от Отца Святаго Духа, Бога Единого Три, аще и звание коеждо, якоже Бог есть верно славимая.

Богородичен: От многих мя Всенепорочная напастей преклонена, и печалей бурю потопляема пристанище спасения, Твоею молитвою Пречистая избави, и от всех исхитивши спаси: да Тя достойно яко теплую Предстательницу, славлю Богородицу во вся веки.

Ин

Предстоиши ныне престолу всещедраго, яко Богословов подобный, и сим единоправный всемудре Григорие, Фессалонитский председателю, иерархов доброто, светло украсився славою священноначалия, Богу и ныне служа.

Ведый чистое твоего помышления Бог, и прежде чрева, и прежде зачатия, верному возглагола Божественному царю яве, Церкви неборимаго быти тя поборника: темже правильным извеством, миром запечатлен еси священноначальства.

Побеждается яве и бедствует собрание Поликиндина дланию твоею, и мудрыми твоими глаголы, преславне Григорие, Фессалонитский председателю: и

яко исчезает дым, исчезе гнилое безумие, твоим громогласным и Богословным языком.

Богородичен: Слово Божие в Тебе Дево, человеческое естество погружаемое страстями, возобрази крайнюю благостынею: и все обнови и посвяти: темже Тобою спасени, Тя славословим во вся веки.

Хвалим, благословим, покланяемся Господеви, поюще и превозносяще во вся веки.

Катавасия: Отроки благочестивыя в пещи Рождество Богородичо спасло есть, тогда убо образуемое, ныне же действующее, вселенную всю воздвизает пети Тебе: Господа пойте дела и превозносите во вся веки!

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатящияся отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Бога человеком не возможно видети, на Него же не смеют чини Ангельстии взирати; Тобою бо, Всечистая, явися человеком Слово воплощено, Его же величающе, с Небесными вои Тя ублажаем.

Страстей непричастен Ты пребыл еси, Слове Божий, плотию приобщився страstem: но решиши от страстей человека, страstem быв страсть, Спасе наш: един бо еси безстрастен, и всемогущ.

Тлю смертную прием, тления соблюл еси тело Твое невкусно, Твоя же животворящая и божественная, Владыко, душа, во аде не оставлена бысть: но якоже от сна воскрес, нас совоздвигл еси.

Троицен: Бога Отца, Сына собезначальна, вси человецы устнами убо чистыми славим, неизреченную же и преславную Духа Всесвятаго силу чтим: едина бо еси всемогущая Троица неразлучная.

Ин

Радости и веселия ныне, мене ради заклавшемуся Твоему тельцу, исполни сего от Тебе чающую мою душу Боже: заблуждена приими мя, и умерщвлена к жизни возведи, и в Божественную одежду спасения, в нетление мя облещи.

Души удаленыя от Бога, и Божественных дарований лишеныя, приидите тепле, и блуднаго обращение восприимше зовем: Отче благий, иже на Небесех, согрешихом Ти вси, очисти и спаси прибегающия к милости Твоей.

Яко имый милосердия множество многое, не гнушайся мене Господи Господи, во многих сластех богатство иждивша, и прибегающа ныне, и зовуща блуднаго гласом: согреших Ти, спаси прибегающаго к милости Твоей.

Богородичен: Спасения Пристанище и Наставление, и Предстательницу Тя имам раб Твой, лютых всех препятый, яко Благая к Богу мольбами Твоими Владычице да избавлюся: яко на Тя всю мою надежду возложих любовию, да верою величаю Тя.

Зерцало Божие был еси Григорие: еже бо по образу нескверное соблюл еси, ум же Владыку на страсти плотския мужески поставив, еже по подобию восприял еси. Отонудуже дом был еси Святыя Троицы светлейший.

Царь благочестивый крилатаго тя воздухоходна показывает, сему споборствующа, яко всего исполнена Божественнаго Духа, на суетумудреннаго неистовствующаго варлаама, глаголющаго на высоту неправедная Богу, егоже праведно победил еси.

Весь быв премудрости лучшия исполнен преславне, свет мирови просветил еси, православия источив догматы: дружеством бо изряднаго любомудрия премудре, Божественный страх во чреве зачал еси, и словеса Духа породил еси.

Богородичен: Песнь Тебе вернии согласно приносим благодарения: Ты бо древнюю разрушила еси нашу клятву Богородительнице, и благословение вси Божественное приемлем, спасение, просвещение, и милость Тобою, и радость вечную.

Катавасиа: Всяк земнородный да възграется Духом просвещаемь, да торжествует же безплотных умов естество, почитающее священное торжество Богоматере, и да вопиет: радуйся, Всеблаженная, Богородице чистая, Приснодево.

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 6:

Показуя, яко человек еси Спасе, по существу, посреде став воскрес от гроба, и брашна сопричастился еси, учил еси крещению покаяния. Абие же к Небесному вознеслся еси Отцу, и учеником Утешителя послати обещал еси, Пребожественный Богочеловече. Слава Твоему востанию.

Слава - светилен святителя

Радуйся отцев похвало, Богословов уста, безмолвия селение, премудрости доме, учителей крайность, пучино слова. Радуйся деяния органе, видения крайность, и исцелителю недугов человеческих. Радуйся Духа храме, и умерый и живой отче.

И ныне, Богородичен

Владычице, всех Владычице, и всех вышшая, всех же превосходящая горних воинств, прости руку державну, и сохрани мир, священники благослови Тебе священнодействующия, монахи же прости, молящия Тебе. Люди вся умири, и сущия в палате: воинство же укрепи во время брани: сей град соблюди, Святая Богородице. И ныне нас сподоби видети Небесное царство, и райскую дверь, егда сядет Судия судити вселенней, во втором и страшном судилищи, Владычице ангелов.

псалом 150-й

Глас 6. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 5:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Крест Твой, Господи, жизнь и воскресение людям Твоим есть, и надеющиеся на Тя, Тебе воскресшаго Бога нашего поем: помилуй нас.

Стих: Хвалите Бога во святых Его, хвалите Его во утверждении силы Его.

Погребение Твое, Владыко, рай отверзе роду человеческому: и от истления избавльшися, Тебе воскресшаго Бога нашего поем: помилуй нас.

Стих: Хвалите Его на силах Его, хвалите Его по множеству величества Его.

Со Отцем и Духом Христа воспоем, воскресшаго из мертвых, и к Нему вопиим: Ты Живот еси наш и Воскресение, помилуй нас.

Стих: Хвалите Его во гласе трубнем, хвалите Его во псалтири и гуслех.

Тридневен воскресл еси, Христе, от гроба якоже писано есть, совоздвигнувший праотца нашего. Темже Тя и славит род человеческий, и воспеваает Твое воскресение.

Стих: Хвалите Его в тимпане и лице, хвалите Его во струнах и органе.

Господи, велие и страшно есть Твоего воскресения таинство: тако бо произошел еси от гроба, яко жених от чертога, смертию смерть разрушивый, да Адама свободиши. Темже на Небесех Ангели ликовствуют, и на земли человецы славят, еже на нас бывшее благоутробие Твое, Человеколюбче.

Святителю, глас 1

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Блаженную в мире жизнь совершив, и ныне блаженных срадуешися собором, и на земли кротких, яко кроткий живещи иерарше Григорие: благодатию же чудес богатеши от Бога, юже подаеши чтущим тя.

Стих: Воскресни Господи Боже мой, да вознесется рука Твоя, не забуди убогих Твоих до конца.

Православия догматы насадил еси, злославия блаженне отсекая терние и веры семя умножая добре, одождием словес твоих, стократный клас, яко деятельный земледелец Богу принесл еси.

Стих: Исповемся Тебе Господи всем сердцем моим, повем вся чудеса Твоя.

Непорочнаго твоего жития блаженне светлости удивишася ангел и человек собори: ибо произволением твердый страдалец и постник явился еси, и иерарх, и достойный служитель Божий, и друг искренний.

Слава, Триоли, глас 6

Во тьме согрешений ходящим, свет возсиял еси Христе временем воздержания, и благоуханный день страсти Твоя покази нам, да вопием Тебе: востани Боже, помилуй нас.

И ныне, глас 2

Преблагословенна еси Богородице Дево, воплощшим бо ся из Тебе ад пленися, Адам воззвася, клятва потребися, Ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава Тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемся, славословим Тя, благодарим Тя великия ради славы Твоея.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, вземляй грехи мира, помилуй нас.

Вземляй грехи мира, прими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохраниться нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегох: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святой Боже, Святой Крепкий, Святой Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святой Безсмертный, помилуй нас. Святой Боже, Святой Крепкий, Святой Безсмертный, помилуй нас!

Тропарь воскресный

Воскрес из гроба и узы растерзал еси ада, разрушил еси осуждение смерти, Господи, вся от сетей врага избавивый; явивый же Себе апостолом Твоим, послал еси я на проповедь, и теми мир Твой подал еси вселенней, Едине Многомилостиве.

сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак "Взбранной Воеводе" или празднику.